



Akademija nauka i umjetnosti Bosne i Hercegovine poziva sve zainteresirane na

Treće susrete mladih istraživača Bosne i Hercegovine iz oblasti prirodnih, tehničkih, matematičkih i medicinskih nauka i inženjeringa (STEMM)

i okrugli sto

Stvaranje uslova za povratak mladih obrazovanih kadrova i doktora nauka u Bosnu i Hercegovinu

koji će biti održani 25. i 26. oktobra 2024. godine u prostorijama ANUBiH-a (Bistrik 7, Sarajevo).

Osnovni cilj susreta studenata III ciklusa i mladih istraživača je formiranje platforme za razmjenu mišljenja o istraživanjima koja realizuju mladi istraživači, stanju i uslovima obrazovanja studenata III ciklusa studija, procjena mogućnosti saradnje, uspostavljanje uslova koji će omogućiti postizanje značajnih naučnih rezultata i ubrzanje istraživačkih procesa na visokoškolskim ustanovama i istraživačkim institucijama u Bosni i Hercegovini. Studenti doktorskih studija u STEMM oblastima i mladi istraživači koji su doktorirali u posljednjih 5 godina predstaviti će na skupu svoja istraživanja. Naučni odbor dodijelit će novčane nagrade za najbolju prezentaciju istraživanja.

Poseban aspekt susreta je uspostavljanje kontakata s mladim istraživačima porijeklom iz Bosne i Hercegovine koji djeluju u ovim oblastima na univerzitetima i istraživačkim institucijama u svijetu. Tim povodom će biti održan i okrugli sto *Stvaranje uslova za povratak mladih obrazovanih kadrova i doktora nauka u Bosnu i Hercegovinu*, u okviru kojeg će biti pokrenuta diskusija o povezivanju i aktivnoj saradnji akademskih institucija i industrije sa stručnjacima u Bosni i Hercegovini i inostranstvu, te predložene mjere za stvaranje uslova u Bosni i Hercegovini koji će motivisati mlade obrazovane kadrove iz Bosne i Hercegovine da se vrate u zemlju i doprinesu razvoju i prosperitetu Bosne i Hercegovine.

<https://www.anubih.ba/treci-susreti-mladih-istrazivaca-bosne-i-hercegovine-iz-oblasti-prirodnih-tehnickih-matematickih-i-medicinskih-nauka-i-inzenjeringa-stemm/>